

四庫全書

集部

欽定四庫全書

集部  
明詩綜卷二十七

詳校官中書臣涂日煥

主事銜臣徐以坤覆勘

總校官降調編修臣倉聖脉

校對官庶吉士臣潘曾起

謄錄監生臣楊怡

欽定四庫全書

明詩綜卷二十七

翰林院檢討朱彝尊編

吳與弼

三首

與弼字子傳臨川人天順初以薦徵至京拜左

春坊左諭德辭不就

有康齋集

婁克貞云先生詩本乎情性原

於義理發自得之蘊

靜志居詩話龜山之出由蔡氏未足為龜山玷也聘君薦自石亨與聘君何損焉獨是鶴書一

至亟令弟子表迎恩之橋綠雲之山建皇華天  
使集慶之亭焚芟裂荷惟恐不速而又跋石亭  
族譜自稱門下士則龜山義不屑出此也詩  
亦俗劣非惟不及白沙方之定山亦不逮

牧轉岡

仄磴陟崔嵬沉吟不知去塵襟一蕭散逸興迷雲樹梅  
殘誰氏花麥漲朝來雨樵牧東西來雜坐迭相語預期  
明日晴重作看山侶

黃嵐坑

連山桃李開晴光爛如許寧知明日花不有今宵雨

宿湖頭

野濶雲爭暝江空雨未休問程須策馬燈火宿湖頭

蕭子鵬一首

子鵬字宜冲新淦人以薦授嘉興府學教授有

雲丘子集

梅文淵云郡博蕭先生從康齋吳聘君游歸結菴玉筍山麓與新喻胡希

仁永豐羅應魁南昌張廷祥新會陳公甫諸君  
子皆友善弘治改元詔徵遺逸郡守汝寧戴瑤  
薦於朝三原王公恕禮遇甚厚除郡學教授其  
詩文體製不一而本諸性命道德之懿溫厚和  
平而豪邁跌宕寓焉戴孟常云先生得康齋  
先生正傳而上下議論則有一峰東白白沙諸

公故其詩文不徒以琢切雕鏤為工 楊國祥  
云先生詩文皆自胸中流出其立意造辭一根  
於理辭達氣和雖動輒  
百言少有離於道者

詩話雲丘先生聘君高弟交於白沙東白一峰  
東海諸公亦與鏡川雲東相酬和詩專學擊壤  
體其秉鐸吾鄉也有自警并示士子詩云天下  
無棄物世間無棄人糞穢可滋禾木朽堪為薪  
牛弊製弓革蠶老吐絲綸吾人一自棄無物為  
比倫農桑墮其業終歲遭饑貧工商廢其職貨  
食靡有因士馬失其學安得成厥身朱門產餓  
殍白屋回陽春萬事毀於逸百藝精於勤人能  
不自棄可以辭汙淪所宜揭諸座右又歲晚寫  
懷云披殘霜鬢方驚老聞到梅花又是春則不  
失為擊壤集中佳句也先生司教時百廢具舉  
集有思樂堂記在明倫堂後則太守黃懋所建

也有尊經閣并夫子燕居記則太守佟時貴所  
修也有西麗橋記則知秀水縣韓旭請於御史  
吳而告成者也餘若楊文璧之迎碧軒梁德興  
之鶴臯梅文淵之冰雪堂戴孟常之環翠軒余  
敬之之松楸皆有記存集中顧柳琰趙瀛  
劉應鈎等修府志縣不采錄因附識於此

### 欲遊羅浮不果

羅浮青壓海門東雲淨江樓入望通  
四百峰頭千樹雪  
夢魂飛渡月明中

### 俞誥 一首

誥字汝欽嘉興人以父吏部侍郎山任官給事

中出知南康府

盼項文祥不至舟抵於陵夜泊

相去不百里相思愁萬重於陵城下泊夢斷五更鐘

李蕃一首

蕃字文盛桐鄉人天順八年貢士官平樂府照

磨

周青士云質先世居千金圩在吳山之麓清江貝先生避地之所先生子翩翩翩翩皆有才

名村民慕之多讀書自好天順中有李照磨蕃善詩鄉里至今傳桐花開到邑侯門之句餘若沈韶州榮希仁范貢士庸彥常陳吏目紀彥綱仲貢士剛叔堅董教諭序大倫皆圩產也當日



諸君豈乏著作惜  
乎泯然無聞矣

### 桐溪

萬年禹鑿東連海百折清流曲抱村風浪不驚魚鳥靜  
桐花開到邑侯門

張

彝 一首

彝字天常海鹽人天順中以貢授晉州判官

### 晉州述懷

微官何事久殊方回首田園業漸荒多病一年三乞老

思歸十夢九還鄉  
椿陰已散遼陽月  
雁影空分海國霜  
樂度休衙獨凝睇  
夕陽西下路茫茫

沈

樾

一首

樾字元茂平湖人  
天順間布衣有樗軒橐

懷方孔明

梅風吹雨日綿綿  
綠漲陂塘已拍天  
為念故人生計薄  
一篙春水種湖田

羅

頤

二首

顧字儀甫紹興山陰人

從軍行 二首

悠悠陟山阿當暑草木焦溪獸苦炎熱獨行向我號南  
望建嶺巔鬼鬼一何高赤日熾如焚岡阜自不毛持謝  
邦族間遠役無乃勞

獨行越荒溪尸積溪流丹四郊何蕭條慘戚秋日寒回  
顧望脩塗淒風集高巒拔劍起哀歌流涕傷朱顏悲哉  
城南詩古今同所歎

錢洪一首

洪字理平常熟人有竹深遺橐

送徐守民歸浙之常山

壯游湖海幾經年老氣凌雲雪滿顛詩思已成芳草夢  
歸心又上木蘭船長亭人折春前柳驛路梅開雪後天  
萬壑千巖舊形勝酒尊茶竈向誰邊

陳鑾

鑾字廷和湖州人

題桃花鷓鴣

瑤池三月正春酣  
淺綠深紅雨露含  
莫唱鷓鴣新樂府  
座中有客是江南

銘師邵

三首

師邵字師邵紹興山陰人  
績之子有半齋集

五馬圖

渥洼水中產龍馬  
房星之精自天下  
星奔電掣勢莫當  
豈比尋常駕轅者  
竹批峻耳鐵作蹄  
雄姿颯沓精權奇

日行三萬等厯塊未許八駿相追隨今觀此圖凡五匹  
畫史經營各臻極就中一匹是真龍異質殊形人莫識  
滄溟氣含雲霧涼蹴齧顧盼思騰驤神奇變化在頃刻  
素壁高堂安可常

趙魏公畫馬

浚儀王孫善畫馬神妙不在江都下朝退從容白玉堂  
意匠經營自揮灑我觀此圖誠偉哉清光夾鏡雙瞳開  
古來騏驎不易得此匹乃是真龍媒尾如流星汗成血

萬里飛騰宜電掣長風颯颯生四蹄百丈層冰蹴應裂  
雄姿眼底苦不多時無伯樂奈爾何駑駘伏櫪飽芻豆  
坐使神物成蹉跎君不見才高往往困泥滓世上英雄  
亦如此

萍

乍因輕浪疊晴沙又見回風擁釣槎莫怪狂蹤易漂泊  
前身不合是楊花

陳寬

二首

寬字孟賢吳人檢討繼之子

題燕穆之楚江秋曉圖

五更人語覺潮生  
估客帆檣候曉行  
樹色未分雲夢澤  
雞聲已動漢陽城  
天空畫角吹霜盡  
月落銀河入斗橫  
欲問楚南千古事  
至今江水為誰清

題先祖畫

綠水園中舊華門  
清風喬木至今存  
千金遺墨人間得  
腸斷題詩到子孫



陳完一首

完字孟英寬弟有簡齋集

錢塘懷古

邊塵卷地北風遙泥馬南來駐六橋汴水故宮猶有月  
海門沙漱寂無潮銅駝夜泣霜華冷銀雁秋飛王氣銷  
五國城頭魂不返傷心誰賦楚辭招

朱應祥一首

應祥字岐鳳松江華亭人

絕句

江面微風鴻浪開  
鳥聲啼過釣魚臺  
暖雲欲送桃花雨  
一片陰從柳外來

祝

祺

一首

祺

或作淇

字汝淵海寧人以子萃貴封刑部主事

旅中元日

異鄉一夜換風烟  
屈指關山路八千  
正是欲歸歸未得  
看人兒女拜新年

趙廷玉

一首

廷玉字芝巖崇德人以入粟補官有芝巖集

金臺留別

笑拂緇塵出帝畿  
一尊重與故人違  
青雲紫禁辭仙仗  
白鳥滄洲戀釣磯  
夜雨尚存三徑菊  
春風仍采故山薇  
舊游天上如相憶  
萬里關河有雁飛

賀

麟

一首

麟字文徵嘉興人

楊白花

楊白花隨風飛青春漸老胡不歸化為浮萍將安依美人  
照臂歌未歇宮樹烏啼冷秋月

張德政一首

德政字平子杭州人流寓南皮國子監生有餘  
生草

送客

旅食正蕭條況別知音者空抱流水琴獨立斜陽下

姚翼

二首

翼字廷輔嘉興人有桂巖集

春日與懷用和游鴛鴦湖

鴛鴦湖上春波平鴛鴦飛入菰蒲鳴秀州女兒肌骨輕  
蘭舟蕩漾微風生何人打鴨鴛鴦驚春雲遶郭花冥冥  
夕陽落盡初月明誰家小閣聞調箏

送人之京

送客京華去江干落日斜百年雙短髻千里一浮槎柳

色河橋雨鶯聲驛路花明朝相憶處雲樹渺天涯

陸琦一首

琦字公璐嘉善人有友蘭集

梅花

雪壓寒香凍未消江城歲晚轉蕭條冷雲漠漠知何處  
夢到西湖第六橋

周漳一首

漳莆田人號小溪官河橋主簿有夢草集

寄弟瑩

年來無處避征塵  
況復衰遲值暮春  
千里綠蕪江上路  
一簾疎雨夜深人  
白雲鄉國回頭遠  
青草池塘入夢頻  
兩載分攜歸未得  
強將封鮓慰慈親

蘇大一首

大字景元休寧人嘗輯洪武以來詩為皇明正

音

詩話景元學于趙子常故富春李玉昂贈詩云  
東山儒者師先生能繼續其所輯明詩正音度

有可觀惜訪  
之不得也

江樓晚眺懷朱孝常

殊鄉歎行役登覽更淒其落日家千里故人天一涯渚  
烟漁父艇江樹水神祠遠道交游少憑誰慰所思

朱彰

一首

彰字有常嘉興人

暮秋偶成

老去逢秋鬢已霜石田茅屋半荒涼商歌一曲人誰聽



疎雨南山豆葉黃

陳昌 二首

昌字頴昌平湖人菊莊集

沈客子云我郡自清江吳隱後風雅

衰落四陳三李之餘無聞焉至正統天順間而始盛一時如陳菊莊外嘉興有姚穀菴海鹽有張芳洲嘉善有周桐村皆卓然成家菊莊吾里先詰才思藻麗長於七言惜其集不傳

題江湖勝覽圖

馬卿子清而癯狂非迂非迂不愛養浮丘伯之黃鶴  
不愛釣任公子之巨魚年來只愛江湖居江湖風月足

清興筆牀茶竈尋常俱船頭紅拂唱巴曲船尾黃帽歌  
吳歛歌吳歛唱巴曲妙舞清商間絲竹白日歡游殊未  
足復擬黃昏秉銀燭風帆催送寒山鐘直向垂虹橋下  
宿

送吳素行之廣西

廣州南望海冥冥百丈牽江幾日程鯨浪打船風正惡  
蜃灰塗屋雨初晴蠻巫祭鬼憑雞卜島戶編氓事象耕  
此去化成皆樂土尉佗不敢更言兵

錢文一首

文字章靖無錫人諸生試不遇遂隱居不出有

鶴叟詩集

新宅

安穩茅柴屋數間起來開眼見南山千帆白日牆頭過  
一鳥青天樹杪還

顧潤一首

潤字廷尚崑山人

送王景方歸杭州

闔閭城外送歸航，流水何如客思長。  
已遣停杯傾別酒，還教攜手上河梁。  
白蘋漁浦迷秋色，紅樹官亭帶夕陽。  
最是不堪凝望處，青山無數隔錢塘。

盧儒 二首

儒字為已崑山人中書舍人

遺安堂為周文伯題 二首

鼯鼠飲河流，鷺鵲槍枋榆。  
適意已云可，多營徒為虛。  
黃

鵲起高翔遨遊升天衢忽逢弋人繳墜翼難再舒退者  
止足全進者忘其軀

衛生不求盈稍足遂愜意服厭成都錦飯舍山陽稼春  
熟收繭絲秋成斂禾穗田翁笑相語秫酒聊同會秉耒  
因時暇翰墨欣游藝多遺一簞金徒為子孫累

鍾政一首

政字里無攷

揚州

樹繞人家水繞城何郎去後若為情不知東閣梅花處

一作盡  
二十四橋空月明

陳景融

景融字菊逸嘉興人

答姚景升

露冷催砧杵風高急鼓鼙登樓回首處目斷塞鴻西

史傑  
二首

傑字孟哲湖州人大河衛百戶有韞線集

竹石圖

雨餘苔石淨無泥  
翠影參差夕照低  
記得推篷湘水曲  
滿林秋色鷓鴣啼

蕪城別唐宗吉

楊子橋頭漲渌波  
分攜無那故人何  
明朝相憶重回首  
莫厭江雲嶺樹多

魯道

一首

道淮安人

送孟繼之歸梁州

尊酒荆門客南征古道平雲連神女廟山繞夜郎城越  
雋開荒服滇池隱旆旌相思日千里腸斷夜猿聲

姚綸一首

綸字允言嘉興人

修竹仕女

瑤臺無信託青鸞一寸芳心思萬端莫向東風倚修竹  
能禁翠袖幾多寒



劉 玘 一首

玘字公績海鹽人有西林集

秋望

天迴黃雲斷林空古木疎遙憐漢庭使千里寄邊書

滕 鷺 一首

鷺字朝儀海鹽人有翠厓集

秋日寫懷

秋色靜柴扉山光鎖翠微紫牽江荇帶紅落渚蓮衣卧

病無人問思家有夢歸相看沙上鳥去住兩忘機

丘吉  
七首

吉字大祐歸安人有順信齋集

詩話瞿宗吉以香奩八題見賞於楊廉夫自是以後從而效之拾西崑之唾餘雜以鼓詞院曲之穢字誦之欲嘔吳人劉欽謨倡無題詩初不見好而一時和者紛紛衆推吳興丘大祐為最故沈啓南贈詩有西漢人材東閣外六朝詩句北牕中之句大祐無題五首中云只解詩中嘲阿顛寧知花底活秦宮絳桃成子花無色銀燭燒心淚有痕在彼法中差勝而全首末工他詩若楊柳一堤沽酒路木蘭雙楫載書船吳淞東去皆連海天目西來總是山斜日半林金翡翠

青雲千尺玉浮圖白鴉谷口霜摧栗黃鶴樓前  
水到門簾外雨多龍洞漏屋頭松老鶴巢稀山  
家雲濕長垂箔水館風多不置牕醉筆題詩蕉  
葉遍夕陽催酒玉鉶空青山無雪梅花後細雨  
生寒燕子前賀監酒船湖左右杜陵茆屋灤西  
東消磨盆盎茅柴酒姑負烟霞榔栗條野寺夕  
陽銀杏葉水村涼雨石楠花松葉微風三竺路  
荷花細雨六橋船又題岳鄂王墓云南國有人  
論歲幣中原無日見官軍頗有思致大祐自號  
執柔道人賦才最敏同郡詩家如唐庠惟周唐  
廣惟勤張淵子靜沈祥彥庠皆奉之為  
師友故當時推許有異興領袖之目也

## 折楊柳

牽馬綰青絲上馬折楊柳願作馬尾蠅遠近隨郎走

擬古

青青澗畔松絲絲谷中蘿悠悠遠道人珊珊雙玉珂道  
遠有返轍川逝無迴波游魚懷清淵逸鳥思高柯昔慕  
蕭與羸今作羲與和白駒不可駐朱顏尤易磨皎皎合  
歡扇文采駕鴛鴦羅隨君願終老其奈秋風何

楊梅

楊梅獨出吳興異龍井名高味不同饒客幾嘗山雨濕  
佳人一笑玉盤空羞看月下櫻桃色不數釵頭荔子紅

更擬明年同采摘要將華髮待熏風

初度日

去歲山城酒一尊今年無恙醉柴門不知有限生辰酒  
合得田家幾瓦盆

畫山水 二首

翠滴松梢雨乍收山光半為白雲留江邊可惜無人住  
閒却蘋花一岸秋

樹樹秋風響澗阿夕陽收處暮霞多何人艇子苕谿上

唱得吳儂子夜歌

春夜

香爐銅爐火不增一牀寒被卧春冰不知明月將人夢  
去落江樓第幾層

懷悅一首

悅字用和嘉興人以納粟仕

詩話用和輯士林詩黃徵君俞邵言有十卷子  
購之五十年始得之止上下二卷而已詩家大  
率吳越之產所常唱和者其居在相湖之南曰  
柳莊亦曰柳溪故自號柳溪小隱又號相湖漁

隱姚允言詩云風流絕勝輞川莊又云雨衣自  
織青蒲葉烟艇長維綠柳根蘓秉衡詩云簾卷  
夕陽吟對酒牕臨流水坐看鷗皆題其草堂作  
也別有東莊曰釣魚所曰觀蓮亭曰清風榻曰  
白雪窩曰載春舫曰耕雲堂曰栽桑圃曰采菱  
灘丘大祐賦八景詩贈焉又有北花園姚廷輔  
有懷氏北花園宴集詩復有水亭名雪艇大祐  
詩醉倚蘭干俯春水是也有齋名鐵松岑公琬  
詩移得徂徠一蓋青是也有軒名月波陳漢昭  
詩湖上華軒瞰碧瀾是也其自題鐵松齋詩云  
青衣開尊傾翠濤詩成落紙飛霜毫園亭詩酒  
之會極一時之盛而允言有送用和納粟之京  
作又有冠帶從容新帝澤之句則知當日以納  
粟入官蓋富而好事者濮樂聞之派也今以相  
湖在望葭莢微茫  
舊迹不可復問矣

開徑

開徑深林裏莓苔綠到門山多雲壓樹溪曲水通村補  
屋交藤蔓疏渠破石根抱琴何處客過我共芳尊

魏時敏

一首

時敏莆田人官無錫縣丞改桃源有竹溪詩藁

寄周淮洲太守

風雨越江邊郵亭對夜眠鄉心孤島遠客夢一燈懸訪  
舊懷他日論時記昔年離魂將別夢幾度到臨川



王仲輝一首

仲輝字里未詳

詩話仲輝詩題王孟端墨竹真蹟後自稱  
曰東軒有紫電清霜習武之餘二私記

題王舍人墨竹

我本山野人夙抱烟霞疾何處慣經行松篁與泉石晴  
牕偶看琅玕圖淋漓醉墨傾金壺崇岡怪石相高下冷  
雨疎烟半有無數竿晴渭川日暖春風輕數竿老嶮谷  
千年霜雪飽數竿欹楚江歲晚寒風吹數竿側淇澳秋

深雨蕭瑟千竿萬竿難盡名林巒彷彿清風生交枝直  
幹平安態勁節虚心君子情對此怡然樂清賞撫卷無  
言發遐想烟雨濛濛語鷓鴣詩懷長在湘江上

朱翰 二首

翰字漢翔嘉興人有石田清嘯集

湯新之云漢翔以教書為

業以養其母事母孝交朋友信性情得其正故  
發而為詩多溫厚和平渾然天成而無雕琢藻  
繪之跡 徐孟時云漢翔詩句法音響咸似乎  
唐 胡廷俊云朱君隱居鄉校一志於詩嚴潔  
雅澹無凡近追琢氣  
味是亦善鳴者也

詩話漢翔詩太圓熟不脫兔園冊子然留心風雅輯郡人詩為槁李英華鄉黨典型藉以不墜其功不可泯也

### 題畫

南游匡廬山不知幾萬丈盤回直至香爐峰五老高高儼相向初疑三山屹立東海中又疑青天削出金芙蓉世人蹤跡不到處物色匪與人間同天梯石磴無窮極一片寒凝古苔色千歲桃花別樣紅四時瑤草非常碧就中有逕深復深白雲洞口猿哀吟一聲長嘯白日晚

神仙渺漠無由尋  
須臾下來心目爽  
便欲移家擬重上  
東風回首塵茫茫  
明月滿天勞夢想

送楊少府貶柳州

洞庭秋色對衡山  
一路猿聲夕照間  
湘浦舟行何日到  
羅池人去幾年還  
烟村土屋連孤壘  
嶺樹松牌界百蠻  
自古中朝通使節  
莫因流落歎衰顏

周瑾一首

瑾字汝成秀水人朱翰弟子

南湖即事

湖水空明靜不波  
蕩舟人遠夕陽多  
秋來無限相思意  
欲采芙蓉奈晚何

朱存理

二首

存理字性父長洲人有野航漁歌鶴岑集

楊君謙云

性父居吳葑門之外左圖右書一吟一咏或應親友之求或寫胸臆之見率皆簡淡高古有味有法不落穠麗枯澀之境其詩未嘗自匿恒亦流布人間而知之者蓋鮮何元朗云野航葑門老儒在荻扁王氏教書與主人晚酌罷主人入內適月上野航得句云萬事不如杯在手一

年幾見月當頭喜劇發狂大叫扣扉呼主人起  
詠此二句主人亦大擊節取酒更酌明日更請  
吳中善詩者賞之大為張具徵戲樂留  
連者數日吳中舊事其風流致足樂也

詩話性父晚年募刻已詩疏曰嘔心少日已無  
錦囊之才泝淚終年空有碧雲之歎髮白因其  
搜索雌黃費我推敲抹去若干存來十一欲望  
收拾在後子孫莫若流傳先自朋友其情甚為  
可憫祝希哲贈詩云書抄滿篋皆親手詩草隨  
身半在舟沈啓南題橐云雖止百篇諸體備不  
拘一律大方諧惜  
乎其橐罕傳矣

文研山再餞文交木太守

崇嶺達深邃芳漪激寒泉言尋支公蹤閱歷成千年鶴

飛遠青冥有亭尚巋然草木屬孟夏山水尤清妍祖餞  
此云再廣林啓長筵

泛吳江

一帆風便到吳江江上飛來白鳥雙舟子飯時吾夢覺  
起看新月坐篷牕

倪光 一首

光字應奎鄞縣人有味易詩集

李杲堂云先生感土木之變學

孫吳書講劔術既久無所合乃更學易學者稱  
為味易先生古詩效初唐音格流麗近體不減

王右丞句如路柳官橋晚山花野店春平  
林藏宿霧疎雨帶春潮真不亞盛唐也

詩話相傳味易能前知游京師於楊文懿郎中  
有中使突至先生見一雀自庭樹集于地已還  
集樹即謂使曰頃來得非因失馬邪六日當復  
使大驚文懿質之對曰雀踴躍物也去樹而集  
於地舍所依也還集樹復其所矣初集自北而  
南水數六故曰六日當復又問馬色曰以水克  
火當黃而近于黑中使曰然客有問婦將產者  
傘忽裂其人失色先生曰傘忽裂則小人見君  
得子矣其學蓋本於邵氏觀梅  
數詩特娟秀不襲擊壤惡派

宿清村

地闊江流險天空山勢高望鄉雙淚落為客一身勞斜



日飛沙鳥西風動野蒿一舟依岸宿深竹夜騷騷

燕遺民 三首

遺民字逸德自號雲谷老人蒲圻人累以賢良

徵高卧不起

詩話遺民詩頗蒼老惜遺集無存  
僅從通志總志中錄得三首而已

感興 二首

寥落湖山曲憑誰話起居出門惟水石相見但樵漁酒  
熟還堪漉園荒欲自鉏久深泉石想早晚賦歸與

泉谷煙花淨林塘暑氣清幽花籬落見好鳥竹間鳴  
黍皆豐稔桑麻自長成還聞茅屋底燈火讀書聲

九日

細雨柴門靜青山客路長黃花應笑我無酒過重陽

天繆

自云語不在  
深悠然自遠

章珍一首

珍字文重鄞縣人

李杲堂云文重以布衣宿望  
為里中五經師不媿真隱

無題

溪橋春水生新蒲綠堪把茅屋掩松雲斜陽鳥飛下

陳

穎

一首

穎江陰人以善楷書舉歷官按察僉事

題湖州慈感寺

過溪纔百步橋轉入禪關高閣斜臨水平林遠見山波  
光隨鳥度秋色共雲閒深愜幽人趣遲留忘却還

黎

擴

二首

擴字大量臨川人以薦授貴池訓導升蘄州府

學教授

西壩草堂為廬陵宋內翰賦

聞說西谿上春風小院開  
野蠶成繭盡江燕引雛迴  
竹裏圍碁局荷香沁酒杯  
晚涼疎雨過隨意步蒼苔

送人還盱江

新涼生白苧游子倍悽然  
客思秋砧外鄉心旅鴈前  
西風千里道斜月五更船  
亦有還家夢隨君到汝川

張淵

一首

淵字子靜歸安人有鴻墩集

詩話子靜孝子也母失明朝夕舐之父好飲醉  
或罵詈則握髻請解長跪移時里黨稱之晚游  
四方與沈啓南史明古僧月舟最善湖州勞太  
守鉞府志其手筆也其居在雙林之鴻墩故詩  
集以  
是名

題白石翁畫虞山古檜圖

虞山老檜三株青斗壇半掩招搖星道人丹成化鶴去  
三檜夭矯飛龍形是誰手植經千載曾見昭明讀書在  
幾迴天上葬神仙不獨人間變桑海古人今人繞樹行

古今人去樹長生乃知勁氣合元化不與凡木爭枯榮  
長洲老石好異者百里攜杯游樹下浩嗟天下有樹此  
樹無我去此樹何人圖三日經營雙眼力滿空蒼翠移  
真跡鶴骨蚪筋左紐文雷裂霜皴古秋色日暮袖歸歸  
不得滿山風雨山靈惜居然贈與卧雲人長嘯寒風生  
石壁於乎石君詩画天下知此筆尤為天下奇勸君風  
雷當掩戶恐化蛟龍擘空去

程文杰 一首

文杰字思周休寧人有湖山吟藁

行路吟

有酒且莫斟聽我行路吟風霜滿面塵滿襟古皆然匪  
獨今我勸君君毋怒今人行是古人路古人一去豈再  
來笑殺今人不回顧朝行吟山沉沉虎狼關隘龍窟深  
暮行吟木陰陰江南鷓鴣無好音行人莫道行路好多  
少行人路中老

詹貴 一首

貴字存中休寧人有竹南集

商婦吟

莫作商人婦商人慣別離門前竹王廟日日卜歸期

莫藏一首

藏字用行

士林詩  
選作恒

海鹽人有素軒佩觿二集

閨怨

雲母屏空怯曉寒  
懶臨青鏡舞孤鸞  
滿庭風雨無情思  
開到梨花不耐看



莫遜  
一首

遜字用嘉藏弟

登六和塔

浮圖百尺倚天開  
落日珠林鳥雀哀  
王氣已銷龍戰後  
山形猶似鳳飛來  
茫茫雲海迷蓬島  
渺渺江湖接釣臺  
回首西湖倍惆悵  
南朝陵墓盡蒿萊

陳金  
一首

金字用礪海鹽人博野知縣

寒食書懷

江上客居三十年每逢寒食一凄然  
青山笑人不歸去  
白髮滿頭徒自憐  
茅簷幾處插楊柳  
梨花半開聞杜鵑  
身世崎嶇杜陵老  
夕陽風浪洞庭船

劉泰  
二首

泰字士亨錢塘人有菊莊晚香二集

湖上暮歸

小驀馱醉踏殘花  
柔綠陰中一逕斜  
日暮歸來問童子

春衣當酒在誰家

小景

雲溪一帶淨無沙  
門對青山是我家  
幾日不來亭子坐  
東風開過紫藤花

王寬

一首

寬字敬敷東陽人  
龍南教諭有建南橐

解任歸書草萍驛

三月草萍驛風花  
點客衣春山啼杜宇  
也道不如歸

舒鑑 一首

鑑字孔昭自號東海釣叟紹興人有恪齋集

寄雲城知己

琵琶洲畔白雲城紅樹千行隔短亭塵迹自悲衣欲化  
故交誰復眼長青江空木落雁初度院小燈殘酒半醒  
終夕相思不相見碧山寒月照疎櫺

羅養蒙 一首

養蒙吉水人

感興

勲業飄零梅子真江山誰與訪遺塵  
艱難獨不悲前事慷慨徒勞憶故人  
太乙圖書元在漢東周禾黍半歸秦  
晴天玉筍秋風上欲薦蘋花淚滿巾

李宗

一首

宗字德紹江陰人有雪窗家藏集

望亭驛和唐李從一韻

迢迢野草接青蘋一望淒然淚滿巾  
幾處樓臺荒舊業

五湖風月屬何人  
寒烟半鎖江村晚  
野鳥空啼驛樹春  
惆悵亂離前代事  
不堪寥落總成塵

施 鈞 一首

鈞字則天紹興人

謝太傅祠

晉室將傾不易交  
先生出處繫安危  
山間紅袖從游日  
天下蒼生望起時  
風暖松亭春載酒  
月明花墅夜圍碁  
轉頭樂事無尋處  
空拂青苔讀古碑

時用章

一首

用章常熟人

遠回吳中

桂席看山興不孤  
西風吹我近姑蘇  
城高暗壓要離墓  
水闊遙連范蠡湖  
野店喚沽雙酌酒  
漁舟爭賣四腮鱸  
故鄉咫尺明朝到  
十載離愁一旦無

喻省

一首

省字伯唯南昌人常州府同知

送友人

梅花殘雪照晴川立馬郵亭思惘然  
媿我飄蓬仍薄宦  
與君分手正殘年一樽行色沙頭酒  
千里鄉心月下船  
垂老莫言歸計拙  
緣編研北是良田

張鎬一首

鎬寧波人

為李景陽題便面

高樹落涼陰幽溪漾晴碧  
山雨夜來多苔痕上磯石



陳焯 一首

焯字惟大

一作文厚

閩縣人有棲雲集

攬秀樓

何年構此山之東  
八牕相對山花紅  
桐山居士老解飲  
何當置我新樓中

顧寧 一首

寧字季康鳳陽人自號夢鶴生

入山雜言

杖藜入山中悠然澹忘歸白雲靄前途行行穿翠微林  
幽鳥聲寂地僻人跡稀惟時歲云暮黃葉紛以飛石罅  
寒泉鳴草根朝露晞撫景自怡悅暫忘塵世機石壁挂  
我巾松風吹我衣將期二三子於焉歌采薇

李達一首

達字兼善自號竹圃道人青田人

過臨江府

故人別後思何堪獨倚河亭酒半酣自笑不如雙燕子

春風先我到江南

吳敏 二首

敏字思德號柚莊吳縣人

沈河

沈河水落秋風早菱葉蕭疎菱角老河邊漁船如缺瓜  
白頭夫婦團圞好往來賣魚兼賣菱官府近無漁課徵  
夕陽醉卧風吹帽

沽頭牖

浮葦生根上陡厓牛羊原隰有人家  
縹車聲響南風裏  
棗樹青青落白花

王昇  
一首

昇字廷禮號玉澗生長洲人

讀曲歌

朝憶復暮憶展轉無消息  
芙蓉顛倒生蓮子中心側

杜嗣昌  
一首

嗣昌字繼文號勉齋吳縣人

詩話正統中吳郡徐庸用理取永樂以後詩編  
為湖海者英集一十二卷大約吳人居其什九  
其發凡云斯集之作間取亡友杜繼文姑蘇集  
中者而合成之今繼文姓名吳中罕有知者無  
論其遺書也長洲馬萬公素輓詞云寄我詩為  
遺世物養親錢作葬身資包山蔡昇景東輓詞  
云半世才名一丘土六經事業九重泉蓋  
亦篤學之士詩雖不見好錄以存其人

### 題畫

秋風嫋嫋露團團朱箔銀樓鎖夜寒一曲鳳簫明月裏  
玉人何處倚闌干

### 徐章一首

章字德彰號省軒吳縣人

貧居

薄田日已荒舊業日已替困蒙三十年良由寡生計人  
非無交游貧賤易相棄周周與蛩蛩飢渴尚相濟所以  
簞瓢人傲焉不狎世處之苟能安其樂有真意

曹侃一首

侃字仲雍號竹齋烏程人

詩話仲雍詩集罕傳其詩有摹張來儀青弁山  
居圖贈鳳林嚴十七蓋永宣間善山水竹石者

也予聞之鄭芷畦云北宋有曹孝子清當代父  
重辟刑於金陵涌白沫尸所流還家至今專祠  
頻宮其子孫散居荳東之西陽村族最蕃多務  
農桑罕通文墨湖海耆英集云仲雅荳東人豈  
其苗裔邪同時有曹  
謙字鳴吉亦能詩

### 寫竹贈戴山黃方伯

昔游湘浦泊蘭橈萬玉森森宿雨消記得推篷涼夜永  
月明一曲紫鸞簫

### 任道一首

字里未詳

畫菜

露芽烟甲曙光寒，紫翠溥香濕未乾。  
記得花時曾病酒，玉人纖手薦春盤。

明詩綜卷二十七



欽定四庫全書

明詩綜卷二十八

翰林院檢討朱彝尊編

桑悦  
六首

悦字民懌常熟人舉成化乙酉鄉試除泰和訓

導遷長沙通判調柳州有思玄集

王元美云桑民懌如洛陽

博徒家無擔石一擲百萬  
胡元瑞云民懌高自矜詡其詩體格卑弱可謂大言無當  
俞汝

成云思玄居士負氣自高凌厲一世其詩賦類多率情有詖世自嘲之意可以資暇啓顏者亦

復不  
少

靜志居詩話民懌說易謂萬物莫逃乎數說詩  
謂刪後無詩率本堯夫之餘唾其於律呂亦拾  
蔡氏之陳言才識平平爾乃敢大言述道統論  
則曰夫子傳之我作學以至聖人論則曰我去  
而夫子來居然以孟子自況而非薄韓子比其  
丈於小兒號嘍其在長沙著庸言自調窮究天  
人之際非儒者所知而曰吾詩根於太極天以  
高之地以下之山以峙之水以流之庶物以飛  
潛動植之日月宣其明雷霆發其震雨露播其  
潤澤散之則同元氣流行收之於心發之於言  
被之管絃則可感天地動鬼神乾坤毀日月息  
詩迺收聲復歸太極其言大而夸狂也幾於悖  
矣

感懷

逝日不可追誰能駐光景春陽媚花草荏苒歲華冷威  
鳳德未成蜨下丹山頂路逢清冷泉徘徊照孤影

東園有奇花容姿鮮灼灼雖是春風開亦是春風落甘  
霖被郊原蔓草輕蘭葯所以高岡松無言倚寥廓

住龍福寺

龍福山虎形有寺枕山陞僧衆暗吞噬一二留披緇

自注

形家言  
如此

法堂久欹傾羅漢無完肌空階劃鳥跡香案縈

蛛絲我了催科業僧榻苦栖遲月黑響蝙蝠風定聞狐  
狸微官責聚斂百賦皆有期長沙病逋負此州更難醫  
譬如理亂髮恐傷首中皮膏油漸浸潤緩緩施梳篦審  
知曠厥職恬退乃其宜妻孥先遣發岳麓不日辭幸逢  
中丞賢加禮免鞭笞言語如春溫勉令撫瘡痍徘徊不  
忍去我亦為我嗤憶昔少年日許國師皋伊豈知坐冗  
職出納伍有司與民算升斗瑣屑誠堪悲登山拜虞舜  
臨淵弔湘纍終當拂衣去涕洟陳吾詞

題鳳洲草堂效吳體

江水四面圍高丘草堂結在丘山頭頻經春雨打不漏  
苦耐秋風吹未休枕邊驚聞櫓聲過檻外俯看雲影浮  
我約吳郎來借住并吞沙草占溪鷗

過十二磯

在梧  
州

亂石危磯急瀨聲扁舟汎汎水中萍月當秋夜十分白  
天到遐荒一倍青引路哨船鳴鼓吹前山軍堡出旗旌  
回頭便有開懷處無數峰巒列翠屏

題画

浮雲出沒吞遙岑  
小亭日日巢秋陰  
美人如玉不可見  
松子自落空山深

懷遠道中

蓬蒿沒馬路  
通身在野真  
為艸莽臣  
莫道先生無武備  
前驅負弩盡同人

文洪

洪字功大長洲人  
成化乙酉舉人  
署涑水儒學教

諭有括囊藁

詩話長洲文氏世載其德希素先生實始之句如  
野猿窺落果林蝶戀殘花自得翻書趣渾忘對  
客言饒有恬憺之致傳之交  
木甫田高曾之規矩不失也

睡起

寂寞掩林扉東風晝方永睡起落紅多斜陽半樓影

南行舟中

露白沙涼月滿空鴈聲歷歷度西風客程尚與鄉關近  
歸夢如何便不同

訪徐尚容

虎谿谿上草堂閒  
千樹江梅香藹間  
欲向南枝問消息  
東風吹我過西山

羅倫一首

倫字彛正永豐人成化丙戌賜進士第一授翰林修撰坐論事貶泉州市舶副提舉尋召還復職改南京有一峰集

詩話一峰以論南陽奪情事謫廣東市舶副提舉實學士陳文所畫策也久之復官南陽已謝



世既而丈死薛御史之綱作詩謂之曰九原若  
見南陽李為道羅倫已復官然李公賢相贊裕  
陵釋建庶人居之鳳陽計其自使即此一事啓  
沃已多亦未可輕訾也一峰專心理學詩不與  
韻士爭長而集中紀夢詩多  
至三百餘首難乎免於癖矣

### 節婦歌

泉流不歸山雨落不上天妾心死不回金石無其堅白  
日經中天飄忽沉西海妾心目不如瞳瞳光不改明月  
揚清輝三五二八圓又虧妾心月不如耿耿無虧時憶  
妾二十春結髮事良人安知三載後羅帷生素塵懷中

五歲兒零落重悲辛  
吾聞陳孝婦夫死養姑心愈固  
朱幡入奏丹書來黃金  
北斗高門戶又聞杞梁妻慟哭  
梁山傾精神變天地  
黃土非無情妾髮可剪妾頭可截  
妾心之白不可湮

詩話一峰節婦歌初不詳姓氏別本或加張字或以為節婦甄氏作誤也詞亦小異

程敏政九首

敏政字克勤休寧人成化丙戌賜進士第二授翰林編修進左春坊左諭德兼侍講歷詹事府

少詹事兼翰林侍讀學士掌院事遷禮部右侍

郎卒贈尚書有篁墩正續橐

李時遠云篁墩著述甚富體格不高

詩話篁墩數與西涯酬和集中存詩數千宛乏  
警策至其輯錄諸書若明文衡新安文獻志甄  
綜有法餘如宋紀受終考宋遺民錄皆有功史  
學獨是議孔廟祀典而屏鄭康成不與未免過  
於刻薄若夫蘇氏倚枕一編謂眉山父子罪浮  
於王安石蓋借文公雜學辨而周內之其意第  
欲為伊川復讐不知  
徒貽有識者笑也

懷平江伯陳恭襄公

赴赴陳將軍平江始開國小年八石弓勇氣屢破賊竭

逢中興主得附昇雲翼當宁念豐鎬京邑望南北安得  
蕭與韓晏歲足兵食將軍家合肥老大諳稼穡一朝被  
簡知舞蹈奉明勅建牙淮水陽諸路盡承式孜孜竭衆  
智䟽鑿靡餘力厥使交輓隄埽濟危岙艘舸隨淺深  
湖壩幾通塞百年民力蘇萬里海濤息居然奠東南不  
復困供億將軍去幾時寢廟見顏色火旗與雲馬夜下  
不可測父老說遺事往往動遐憶征夫多苦辛國本在  
培植賢孫今代將當復守成則東風吹客衣清口月初

是公忠風所欽再拜續銘刻

蹋車行

田夫蹋車如蹋弩田婦蹋車心更苦老夫不雨將奈何  
稻隴看看作焦土我行見此三歎息欲助農忙恨無力  
假令一旱似往年豈獨憂貧復憂賊我雖七尺金紫身  
聖恩許作歸耕人詩書不了餬口計與爾將來同苦辛  
擊鼓揚旗禱神福旦莫先憂食無粥賢侯恤民天所憐  
好雨時來歲還熟

功臣廟下作

雞鳴山側英雄坊朱門半掩青松長功臣廟食自洪武  
下車進謁開中堂元勲佐命推六王儼然並坐徐與常  
左李右鄧沐最少霜鬚獨見東甌湯秉圭服冕垂衣裳  
異姓聯翩如鴈行公侯十六分兩傍金貂玉帶相輝光  
辦香一炷三歎行却走苔墻觀畫廊竭從真主興濠梁  
長江飛渡入建康血戰往往皆鷹揚當時陳寇號最強  
諸軍一劒番水陽不日降旗來武昌神威自此若破竹

僭竊次第歸天亡按圖未取東海方下令先縛鹽城張  
遠清閭廣服蠻徼繼下滇蜀連氏羌東南略遣瘡痍息  
直指幽都驅犬羊羶裘北適居龍荒乾坤一統成帝鄉  
九州入貢紛梯航文孫繼承萬億載諸將之功何可忘  
禮官四時奉蒸嘗令典與國同無疆摩挲丹青落日黃  
一時際遇思明良陸機有頌媿莫續風雲颯爽天茫茫  
暮雨野泊

黑風摧山雨如注未到下邳無泊處暗中雜還人語聲

且逐淮南漕舟住淮南漕舟三百強粉字舵樓成堵墻  
輪更轉箭鎮相續似覺人人嫌夜長滅燭悠然倚牀坐  
遠村曙雞聞一箇前途早有役夫來岸東相呼岸西和

送黃欽都閩出守洮河岷三州

前歲平遼過海東今年分陝駐湟中三城斥堠提封遠  
千里蕃戎節制通開府欲施經濟策留屯先上便宜功  
從來禦侮須才俊莫向沙場歎轉蓬

度東山嶺



石橋駐馬問田翁一塢深深隔樹東  
帝子閣前沙似粟  
楚神祠下路如弓  
疎松古磴風微動  
細草陰厓雪半融  
回望紅塵才數里  
不知身在亂山中

海子

十里城陰道西湖一派分  
秋晴沙岸尾時見白鷗羣

送克寬弟南還至茶菴獨歸

垂野陰雲一望迷  
送行愁問路東西不知幾日黃梅雨  
門外青泥沒馬蹄

題小景雜畫

綠樹蕭然蔭草亭  
酒船安近蓼花汀  
分明一夜溪頭雨  
洗出春山數點青

莊景  
五首

景字孔暘江浦人成化丙戌進士改庶吉士授  
檢討以諫謫桂陽判官遷南京行人司副終南

京吏部郎中天啓初追謚文節有定山集

李世賢云

定山詩好用乾坤字  
楊用修云定山早有詩名頗有絕可笑者如太極圖兒大先生帽子高

贈我一壺陶靖節還他兩首邵堯夫又贈我兩  
包陳福建還他一匹好南京聞者捧腹然晚年  
詩入細竟有可並唐人者 俞汝成云莊定山  
詩雖不步武唐人而去時調則遠 上元美云  
莊孔賜佳處不必言惡處  
如村巫降神里老罵生

詩話湯義仍好填詞人或勸之講學湯云僕終  
身言之頗諸公勿省耳諸公所講者性僕所言  
者情也旨哉言乎自昔衮衣陳詩章甫雅言昔  
之聖賢類不廢詩至曰女心傷悲殆及公子同  
歸又曰其新孔嘉其舊如之何抑何其婉曲入  
情也自堯夫擊壤而後講學毋復言詩言詩輒  
祖堯夫遂若理學風雅不並立者然一峰康齋  
白沙定山咸本擊壤而定山尤甚所謂太極圖  
兒大先生帽子高等句不一而足以是為詩其  
去張打油胡釘鉸無幾矣甘泉從而輯之以詔

學者謂非此則與道學遠也然則打油釘鉸反  
為近道之言而詩三百篇春秋士之思皆可  
置勿錄也竊為理  
學諸先生不取也

憶舍弟

天邊聞一雁杳杳向南徂今夜西風冷他鄉小弟孤五  
人千里去九月一書無欲作千行淚憑誰寄客途

題畫

遙山青兩峰老樹紅一葉我懷不可羈月明江獨涉

一作

空山下  
明月

送博羅何孝子

白酒江門暖北來風正寒  
釀方君不錄明日寄書難

釣魚圖

溪上春雲與浪飛  
溪頭春水鯊魚肥  
野人只是閒無事  
日出船來月出歸

寄壽州廖同知

江鄉煙景不須爭  
客裏風花亦有情  
我見白頭張汝弼  
今年又在壽春城

黃仲昭 一首

仲昭名潛以字行莆田人成化丙戌進士改庶吉士授編修坐諫鰲山煙火予杖謫湘潭知縣遷南京大理評事進寺副乞休弘治初起江西

提學僉事尋致仕有未軒

劉玉執云先生遺丈開諸理者微微諸事

者核模寫窮物象之真吟咏得性情之正

詩話僉事以詞臣建言宜有巖巖氣象而詩特和易近人其謫居寫懷也有云一片歸心留不住非因故國有尊鱸其歸田雜咏也有云悔殺昔年成底事紅塵鞭馬聽朝鐘其澹於世味也

可見已初自號未軒羅彙正謂曰君之未余知之吾道未至於孔孟吾功未至於伊周吾民未至於唐虞君之未也若士未大夫大夫未公卿則衆人之未也晚居下泉築俱樂部亭更號退巖居士云

### 明妃詞

風起龍堆滿面沙  
舉頭何處望中華  
早知身被丹青誤  
但嫁巫山百姓家

### 章懋一首

懋字德懋蘭谿人  
成化丙戌進士累官南京禮

部尚書贈太子少保謚文懿有楓山集

詩話楓山自言不工於詩故集中存者甚少嘗見思陵御書一幅詩云未央鍾動曙光生隱隱初聞柳外鶯風靜御爐香篆細日高谷座袞衣明螭頭陛推黃麾仗豹尾班聯白玉珩最喜及時勤庶政蒼蠅聲裏聽雞鳴真跡存高上舍佑鈇處觀者疑為思陵御製寶楓山集中詩也惟及時二字集本作君王御筆更之是楓山一集曾歸乙夜之覽矣附識於此以當閒寶舊事

遊牛首山和沈仲律韻

乘興來山寺清尊共解顏  
院深春晝永香裊午風閒  
短屐行應遍危欄倦亦攀  
白雲飛不定何處是鄉關



張

弼  
十首

弼字汝弼松江華亭人成化丙戌進士授兵部

主事轉負外出知南安府有鶴城東海二橐

李

之云東海詩清鍊脫俗力追古作其自評書不  
如詩詩不如文此英雄欺人不足信也 王濟

之云東海詩不苟作必起詣豪宕擺脫近世  
尋常語 王子衡云先生詩氣豪而逸發乎性

情之

正

詩話汝弼詩云酒杯不及陶彭澤詩法將隨陸  
放翁故其律體全學劍南如魚兒浦口酒船小  
燕子風前茶焙香酒遇故人隨量飲花當好處  
及時看自從都下三年別不寄江東一紙書孤

艇夕陽荷葉亂小樓春雨杏花殷鬢毛零落風  
前驚心緒悠揚簇上蠶一頃新田收晚稻數椽  
茅屋補秋蘿浪花作雨汀煙濕沙鳥迎人水氣  
醒萋萋芳艸日將暮點點飛花春可憐漂水入  
春冰半黑平山消雪艸微青西飛白日忙於我  
南去青山冷笑人草露松風千里夢秋霜春雨  
百年心僧中今見大小朗世上爭傳長短歌霍  
光有傳何曾讀疏廣無金亦自歸可稱具體與  
定山輩專做擊壤者不同也

紅梅贈翁僉事

庾嶺小紅梅風標天下絕昨日幸同歡今日傷離別玉  
遂兩三聲吹落燕脂雪寫以贈知心相攜共明月

咏竹

擊節歌離騷湘靈招不得開門看月明幽篁倚蒼石春  
風千萬花花落春無跡此君冷淡姿常有好顏色

假髻曲

東家美人髮委地辛苦朝朝理高髻西家美人髮及眉  
買妝假髻亦峨然金釵寶鈿圍朱翠眼底何人辨真偽  
天桃窗下來春風假髻美人歸上公

宜興好寄弋陽尹李端卿兼柬諸公

吳中山水宜興好曾在京華得飽聞踪跡十年嗟未到  
風煙一壑要平分筍饒茶塢銅官雨荷蓋蘭州汧汭雲  
更問東坡田可贖便教兒子蚤耕耘

棠溪景

悠悠下村路望望皆煙樹何處讀書聲山禽忽飛去

送張維亨之沂州

瑯琊臺下看新晴聽得陽關第四聲千樹梅花滿城雪  
也應難比使君清

俞舜卿僉憲許相未送詩以促之

南海黃柑未見分  
舉杯空望嶺頭雲  
元宵燈火相將近  
空手歸來惱細君

絕句

空濛山色晴還雨  
繚繞溪流直又斜  
短杖微吟過橋去  
東風滿路紫藤花

方文美畫

花落春歸客未歸  
仲宣樓上倚斜暉  
故園遙在三江外

綠遍薜蘿燕子飛

題畫

雲杉如薜屋如蚶詰曲溪流瀉碧潭獨立小橋吟不盡  
插天晴翠太湖南

賀 欽一首

欽字克恭廣寧人成化丙戌進士官給事中天  
啓初追謚恭定有醫問先生集

春晚

落盡羣芳枝已空  
游人枉自怨東風  
誰知寂寞幽園裏  
猶著楸花一樹紅

林瀚一首

瀚字亨大閩縣人成化丙戌進士歷官南京吏部尚書贈太子太保謚文安有泉山集

詩話文安公父元美中永樂辛丑進士仕至撫州守以循良聞公有子九人康懿文僖官皆至尚書諸孫為尚書者復二人其他階大夫郎者不數焉門閥可云盛矣公嫻於制舉藝吾鄉姚處士濟哀集明一代時文三百八十家特推公為之首詩不耐深思然一門濟濟儒雅風流不

特三世五尚  
書有集而已

寄鄭郎中

鳳臺一別四經秋  
羨子投閒未白頭  
為問濂江江上路  
幾人烟雨櫂歸舟

李傑十五首

傑字世賢常熟人  
成化丙戌進士  
改庶吉士授  
編修累官禮部尚書  
贈太子太保謚文安  
有石

城山房橐

胡世高云宗伯詩文明暢醇雅渾厚  
和平悉從經學流出未嘗為鈎棘詭



亢之言以驚世取譽  
自然從容於渠度中

詩話張乖崖詩云獨恨太平無一事江南閒殺  
老尚書虞山李文安以忤劉瑾致政歸築逸我  
堂壘石為山暇游昆尚二湖賦詩云虞山山下  
是吾廬三載棲遲得自如却怪四方多事日江  
南閒殺老尚書蓋其時山東江西四川湖廣盜  
賊並起故為是言也文安不以詩名然與李文  
正吳文定諸公酬和不輟其自序云余於詩丈  
初無師授亦未嘗規倣古人將以是名世但竊  
祿詞垣公私所需不容已爾故意之所到信筆  
書之未嘗刻苦思索必求其工也可謂得失寸  
心知矣錢氏列朝詩集搜羅鄉  
曲先進靡遺獨不及文安何哉

## 早行舟中有作

荒雞一再號東方漸生白衆星尚駢羅天宇黯以黑晨  
光正蒙昧莫辨河山色舟行趁潮長寧費牽挽力蘆汀  
雁驚起鳴聲何噤噤輕颺拂涯樹涼露時一滴前村燈  
火明茆屋疎林隔蓬窗攬衣坐悠然忘盥櫛宵征自可  
怡此景更奇特

登泰山絕頂

五嶽鎮坤維其東雄泰岱巖巖一何高屹立霄漢外神  
靈所攸鍾秩祀宜萬代我來屬深秋登陟覽勝槩雲開

旭日升峰巒新染黛盤盤上澗谷石磴豁復隘涼颿起  
虛谷颯颯響靈籟兩崖戢霜樹爛斑殊可愛五松非秦  
封亦已類偃蓋躋攀入天門縹緲凌上界睇盼感廢興  
喟然發長嘅七十二帝王封禪遺跡在玉檢時復出厓  
礪亦殘壞茲山自今古直與穹壤配絕頂氣益清衣袂  
浮沆瀣羣山紛後從厯厯同聚塊中原小如甌滄海縈  
若帶置身九重近誰謂天下大吾言良匪誇聊以志一  
快

泰山竹林寺與陳大叅楊僉憲同遊

陟險千萬盤未識寺門處一澗委蛇來齒齒亂石聚飛  
梁忽橫亘清泉下奔注其間有靈湫蛟龍所蟠據時經  
不測谿心動髮毛豎肩輿尺寸進僕夫汗如雨我欲飛  
步登厓傾足難駐青鞵與布襪惜不攜此具貪奇不知  
止竟忘垂堂慮緬懷得一樂未足償千懼峰回見林薄  
飄然發佳趣古殿三兩楹滿庭蔭高樹百果經秋霜甘  
美皆可茹同行得二妙把酒勸酬屢酒酣陟巘巘莫與

仙靈遇高寒覺衣單俯視飛鳥去白雲出巖阿英英若  
春絮登臨興無限日暮歸何遽摹寫詎能窮率爾成短  
句

秋崖

秋山鬱岌蹇懸崖削如壁自非插羽翰可望不可即若  
人何好奇捫蘿每登陟濕雲潤我衣落葉墮我幘逍遙  
空青外似與塵世隔便欲御冷風飛行覽八極

題王孟端松泉圖次饒介之松濤韻

山椒怪石蹲如狶松崖巉巖不可梯蒼濤洶湧翻地軸  
白日晦冥天為低高枝棲鵲巢欲墮哀鳴何處求其雌  
初疑龍蛇相格鬪鱗鬣無乃多傷夷又疑羣仙互來往  
翠蕤羽節紛祈祈影作大陰連巨壑根蟠絕澗滋寒漪  
何人圖此心獨苦九龍山人揮灑之筆端生意妙莫測  
真宰上訴天應悲驚風颯若坐間起毛骨凜凜難禁吹  
林泉逸趣我所嗜相對不覺心神馳世間真假俱一夢  
以夢非夢良亦癡卧遊何必謝公屐千峰遍閱消移時

畢韋一去藝中原後代未聞工者誰山人能事寧止此  
布衣上結明主知圖窮載誦醉漁作此翁胸次亦已奇  
歌聲悲壯意超脫不似杜老憂時危豈期兩美偶相合  
有聲之畫無聲辭百年勝賞不易得俛仰忽復令人思  
雪泥鴻爪宛然在風流雲往何由追後來視今視昔  
揮毫試和松濤詩

題謝廷循山水

峰高遲出日山氣曉氤氳葉潤林藏霧崖分谷吐雲客

衣晴亦濕瀑響遠逾聞茅屋依深樾逃虛羨隱君

遊靈谷次鄭司徒韻

吾愛山中筍蕨甜山靈況復不吾嫌日華濃染緋桃色  
雲影輕籠翠柏尖尊酒興催詩興發管絃聲與鳥聲兼  
韶光滿眼供春望分付奚奴為卷簾

過蔡村

白沙灘接綠楊堤遍野青黃麥秀齊萬雉都城天咫尺  
幾家村落水東西濛濛細雨來帆重漠漠平蕪去鳥低



岐路年年成底事  
遣懷只合醉如泥

奉祀天壽山

有序

五月十三日上以亢旱命臣傑祭告天壽山之  
神晚至昌平雷雨忽作次日四鼓祀畢出陵月  
色如晝歸至沙河回望西北諸山雲氣變黧流  
水已沒斷橋矣十六日京師雨十七日大雨霰  
旬霑足賦詩志之

玄雲四合雨傾盆  
朝野歡騰頌至尊  
已藉靈祇通上帝

自應烈祖佑神孫禾苗漸發高低隴草樹重榮遠近村  
猶記昨宵祠禱罷滿山明月照陵門

孔廟紀事次西涯李閣老韻

至聖由天縱斯人足典刑道高王只素文在簡猶青秩  
祀從先代尊榮合萬齡廟堂森穆穆金碧煥熒熒回祿  
噓妖沴炎光迫紫冥忽驚空邃宇倏已及前庭古壁殘  
遺冊宮碑剝舊銘蒼烟隨燼滅焦塹逐風零寧記諸賢  
像誰摹老檜形衣冠猶在望絲竹杳難聽驛報來東郡

封章入大廷聖情深隱側睿旨重叮嚀祭告誠宜達趨  
踰職所丁瞻依懷闕里對越想英靈大宅門牆峻高林  
艸木馨尼山遙可覩泗水近須經衣露常沾潤帆風渺  
御冷郵程占夜月征旂帶晨星傳詔修香幣騰書具鼎  
鉶莚芽行漢禮作器象周型祭統寧教墜天機自不停  
春陽發壇杏和氣長階奠揆日營新制推波濯醜腥巖  
巖增壯觀翼翼闕重局儒道今滋盛文風被八溟

題扇

竹徑清陰合行行路欲迷仙家何處是只在石橋西

雜興

花霧曉濛濛落紅飛不起文采雙鴛鴦蕩漾綠池水

次徐文量主事韻

西風獵獵走驚沙歲晏登臨倍憶家爭似南州徐孺子  
寒林匹馬看梅花

謝鄭東園惠荔枝用原韻

閩中佳品數方紅蜜漬鹽蒸恐未工曾聽詞林前輩說

方 岳李  
葡萄風味略相同

題倪雲林竹

倚風寒翠不禁吹  
秋盡瀟湘暮雨時  
極目蒼梧魂欲斷  
隔江休唱竹枝詞

徐 恪  
一首

恪字公肅常熟人  
成化丙戌進士累官南京工  
部右侍郎

朱仙鎮岳王祠

汴洛淒涼寢廟空  
中原恢復仗英雄  
黃龍未遂長驅志  
鐵馬猶傳轉戰功  
貔虎散歸烽戍老  
河山遺恨古今同  
西風一掬懷賢淚  
灑向荒祠夕照中

陸容一首

容字文量太倉州人成化丙戌進士授南京吏部主事改兵部坐言事出為浙江右叅政有式齋集

詩話叅政與張亨父陸鼎儀齊名號婁東三鳳詩皆非所長式齋則至登第後始為之見所述

菽園雜記若其藏書之富見聞之  
周洽似非亨父鼎儀所能及也

### 感遇

松株青鬱鬱冬夏不改顏園工徇時好移栽盆盎間屈  
為虬龍形束縛苦不閒豈無培養恩適性良獨難吁嗟  
梁棟材誤作花艸看愛之不以道何如老空山

戴

縉一首

縉南海人成化丙戌進士累官工部尚書

楚江旅懷

薄暮過瀟湘秋空楚水長黃蘆千里月紅葉萬山霜客  
夢懸雙闕鄉心逐五羊羈情誰與晤勞者若為傷

韓文

二首

文字貫道洪洞人成化丙戌進士累官太子太

保戶部尚書贈太傅謚忠定有質菴存橐

何粹夫云

先生詩溫如春風清如流水險韻廢和至數十  
首而句穩意新無牽強重累之病如層濤疊浪  
可喜可愕而無  
不出於於自然

詩話忠定公餘即事吟咏集中十  
九皆七言近體取自怡悅而已



西藍禪院

西藍禪院夕陽開古殿碑殘畫雜苔霜冷松林無鳥宿  
月明竹徑有僧來霍山東抱諸峰合汾水西流九曲迴  
老去未忘憂國念浮雲直北望燕臺

羅漢院

寺近孤村路轉西小橋流水夕陽低經霜崖果猿偷摘  
欲暮風林鳥亂栖蛙粉尚留題壁字香灰半入種花泥  
箇中老衲耽幽寂不為登山不渡溪

陸淵之

淵之字克深上虞人成化丙戌進士歷官布政使有東臯集

黃鶴樓

落日江流帶女牆飛樓百尺俯蒼茫  
筵前却怪當年事鸚鵡何緣到楚鄉

潘

蕃

一首

蕃字廷芳崇德人成化丙戌進士累官南京刑

部尚書

詩話尚書敬恩中外於蜀於粵屢立戰功以忤  
劉瑾被逮與劉忠宣同戍甘肅理誅復官優游  
林下簡朴如貧士時人為之詩曰尚書歸來無  
第宅稅地種花兼種魚舉網打魚魚換酒花前

醉倒老  
尚書

吳越戰場

吳越興亡宛目前游屯涇上草芊芊夕陽滿地生寒色  
野燒緣溪斷暮煙麋鹿歌臺今往矣鷓鴣舞殿亦淒然  
祇餘賜劍當年恨惆悵東風哭杜鵑

顏瑄 三首

瑄字寶之江陰人成化丙戌進士官戶部主事

有一菴詩抄

詩話寶之賦才敏捷嘗即內兄夏希明座上令  
侍女喬妙福捧硯王碧雲展紙和香山琵琶行  
韻援筆成篇不竄一字詩  
多穠縟七律頗近錢郎

過沛縣

獨坐蓬窗對月明靜聞鼙鼓已三更舟將泊處聞人語  
驛未臨時見吏迎泗水亭前荒艸遍歌風臺上宿雲平

英雄回首今何在撫景空懸萬古情

登鳳凰臺作

鳳凰臺上雨初收天際涼雲拂地流  
萬里關河明落照  
九重宮闕動高秋  
青山近遶城頭路  
紅樹深藏驛外樓  
莫怪臨歧重惆悵  
青袍三載此淹留

宿河西務

漠漠煙光漸欲昏  
人家一半掩柴門  
鼓聲近報沙邊驛  
帆影遙連郭外村  
紅歛夕陽微有迹  
綠浮春水淨無痕

怪來野趣難消遣自倚蓬窗勸酒尊

樊阜 三首

阜字時登縉雲人成化戊子舉人官延平儒學

訓導有樊山摘橐

詩話枯蒼山壤風雅之士寥寥獨縉雲樊氏門才頗盛時登而外曰敬公慎曰敘公倫曰源時濟曰通時亨曰昌永盛曰甫永美曰貴永芳曰鐸伯廣皆能詩叙有用拙橐源有竹軒橐昌有友菊詩甫有硯櫟集貴有桂岡集鐸有畏齋存橐惜乎流傳者寡矣

田間雜咏

烏柏蔭我塙白茅覆我屋荷蓀朝出耘依依暮歸宿少  
婦勤織縫諸孫解樵牧秋風禾黍收寒日照原陸鳥雀  
啾啾鳴園籬多艸木官租及早償莫待里胥督

灣河舟中呈鄭廷韶吳景端

朝發燕山陽暮宿灣河側高樹蔚繁陰浮雲淡無色  
彼西日馳憂心恒惻惻賴我同心人相期崇令德

馮公嶺道中書所見

馮公今去久嶺路至今聞紅樹邨邨雨青山片片雲野

橋松板架巖溜竹筒分日落人行少時參鹿豕羣

張昇一首

昇字啓昭南城人成化己丑賜進士第一累官  
太子太保禮部尚書贈太子太傅謚文僖有柏

崖集

渡淮

長淮一道入滄溟滾滾黃流若建瓴回首故鄉何處是  
春風多少短長亭



屠

勲 二首

勲字元勲平湖人成化己丑進士累官刑部尚

書加太子太保贈太保謚康僖有太和堂集楊

寧云屠公屢更劇曹手不釋卷與余為文字  
交居嘗過從必有倡和辭章之名播於中外

詩話吾鄉先正若呂文懿有子秉之屠康僖有  
子文升詩名皆勝其父然兩公韻語亦自成家  
屠集如浦樹遠分揚子渡江風吹過石頭城吟  
看雁影秋來早坐聽潮聲月上遲夢裏只疑身  
有翼燈前未信眼生花江湖路遠身仍健天地  
思深罪亦宜梵寺可能添一榻水田應只欠雙  
鷗山腰樓閣天低樹江上人家水拍城八韻八  
又皆秀句一年一度此深杯均饒風致宜西涯

簞墩守溪遠菴諸  
公交與和酬也

題畫寄楊應寧

頽雲濕不飛釀作楚江雪林木凍已僵汀葦吹欲折荒  
村煙火稀野寺鐘聲歇端居思美人千里成間別天寒  
鴻雁宵地僻音塵絕囊琴誰共彈悵望頗鬱結貽此瓊  
華圖聊以表高潔

小畫

浦雲煙樹路盤紆白首青山興不孤我亦有亭歸未得

東風吹雨長蘼蕪

邵

珪

一首

珪字文敬宜興人成化己丑進士官至嚴州知

府有半江集

李賓之云邵文敬善書工碁詩亦有新意如江流如白龍金焦雙角

短又有半江帆影落尊前之句人稱為邵半江

馬鬬虎

天門名馬真龍媒萬里新自流沙來先皇知爾才磊落  
放入虎圈與虎搏霜蹄蹴蹋虎即斃英風颯爽來天際

當時觀者皆歎嗟唐家豈數拳毛騮

周瑛

瑛字梁石莆田人成化己丑進士仕至四川右

布政使有翠渠類稿

林雨可云先生奇語奇情出之簡易嘗自題稿云老

去歸平澹時人或未知當為定評

履霜操

母兮兒憎父兮兒怒跼蹐天地憊不知其故父在高堂  
兒在郊圻曩興履霜踵血淋漓荷衣不煖停食不飽不

即捐溝壑念我父母父本兒愛母本兒怜一朝放逐實

兒之愆維鳥有鷖維蟲有羸父兮母兮其或歸我

羅子應云

韓子履霜操覺伯奇有怨怒之氣未免害義若翠梁作一篇之內吉甫惑於後妻之失既不可掩伯奇傷已自訟不敢怨怒而覲父母自省之意亦明詞婉意切足補韓子之失與拘幽操並讀可謂一忠一孝也矣

### 感興

持刀斫月光月光何曾斷縛帚掃樹影樹影依然滿人  
皆惡樹影礙此月明多樹根苟不拔其如月明何

### 詠古送陳白沙歸南海

東都事矯激西晉尚清虛一時意自適社稷隨丘墟譬彼門戶開轉運由其樞大勢一傾倒力救將何如君子閱世多立說慎其初擇中而守固孔氏有遺書

馮蘭

蘭字佩之餘姚人成化己丑進士改庶吉士仕

至江西提學副使有雪湖集

黃太冲云佩之在京師與西涯木齋

雅相好木齋歸田後與佩之唱和無虛日間書以寄西涯西涯輒和之有云惟應兩巾屨長得夢中遊又云羨君江海上海上猶有舊同遊是時西涯為一世宗工而於佩之則敬為老友也

詩話謝朓以宰輔歸田與佩之締姻日以詩  
札酬報澶淵劉應徵知餘姚縣事為刊湖山唱  
和詩二卷集中句可采者謝如嘉客不來虛掃  
榻好山難致即移家路當樹與雲深處舟及潮  
隨月上時野色遙連晴樹杪秋聲忽動暮鷗羣  
樓臺月上寒雲盡村巷泥乾宿雨餘扶老最便  
方竹杖入秋却愛早禾田馮如鏡裏流年從老  
去山中舊業得生還遠林返照明村落斷岸分  
流入海田絕頂夜晴先見日中峰春暖易生雲  
雨疎籬落菊開晚水涸湖田廡下遲秋晚菜畦  
依水種日斜村媼過鄰春雲中僧住茅茨屋雨  
後人耕斥鹵田沙淨雨苔無履齒竹深秋墅有  
碁聲雷霆忽作三更雨江海疑生六月冰燈火  
誰家無樂事江湖此夜有離人城市已無蹤跡  
到江湖合有畫圖傳具  
詩頗難優劣詢同調也

奉答木齋病起見懷二十韻

海氣明曙霞湖光渺秋昊十月木未霜楓林景逾好疎  
疎籬下花寂寂澗邊艸閒居田事休委巷人跡少東瞻  
牛屯峰秀矗雲之表種梅已成蹊中構一亭小謝公有  
好懷藉此以終老佳辰縱嬉遊真境越清悄倚酣或高  
歌興與秋空杳一卧動逾月予懷幾昏曉得詩知強健  
頓紆腸九繞古人慎養生弭疾今須早周爰重勿樂莊  
篇戒如槁金蘭久要義歲寒願相保詩古意與長三復



聞素抱喜公眼增明萬象都了了南齋冬日暄遺編得  
幽討擬尋亭上盟牽舟汝湖道梅溪香欲浮苔石淨於  
掃扶杖我能陪公無笑潦倒

張

習一首

習字企鵝吳縣人成化己丑進士除禮部主事  
歷負外郎出為廣東提學僉事

和石翁水閤

舊居忽異東西瀼白水茫茫不見鄰始下方林堪濯足

每疑汎宅僅棲身魚鰕易覓應兼味畎畝全沉已概貧  
好鼓蘭橈放歌去乘桴浮海是何人

楊光溥 一首

光溥字文卿沂水人成化己丑進士有沂川集

春去

樓外春帘近酒家鶯聲巷陌夕陽斜東風暗地隨春去  
幾日無人喚賣花

梅江

江字文淵嘉興人成化己丑進士授廬江知縣  
擢南京貴州道御史出為四川按察僉事

都門送弟還鄉作

高城曉角意如何  
執別離亭淚欲沱  
池館夢中青艸盡  
鵲鵲原上白雲多  
西風苦憶歸帆影  
落日時聞鼓棹歌  
最是明朝傷獨處  
寒山古木對嵯峨

呂憲一首

憲字秉之秀水人大學士原子中成化辛卯順

天鄉試由中書舍人遷禮部郎中仕至太常卿

有九柏山房存橐

石邦彥云太常遊於二泉方石之門詩古澹冲雅微婉縕

藉家居日對九柏吟咏不輟忘其老之將至也

詩話太常詩名藉甚朝野特為吳中文沈諸君所推重人不敢以任子視之是時詩派方習為纖麗圓熟太常特好盤硬語宜其傲倪一世也六十詩云治聲社酒分鄰父含笑山花付侍兒移病詩云官衙馬瘦無餘粟海國魚鮮正晚潮寄友詩云愁無却老青精餠夢有藏書白石龕皆瀟灑可誦

天寒夜卧

雨久當成雪天寒不肯明君親南北夢城闕短長更有  
病官何物無聞老此生茅茨築新屋妻子念歸情

吳寬  
十三首

寬字原博長洲人成化壬辰賜進士第一授翰林修撰  
歷諭德左庶子少詹侍講學士擢吏部侍郎累官禮部尚書  
兼翰林學士掌詹事府事

卒贈太子太保謚文定有匏菴家藏集

李賓之云原博

詩深厚穠郁脫去凡近而古意獨存  
云匏菴為詩用事渾然天成不見痕迹洗盡近

世尖新之習 王元美云吳乾菴如  
學究出身人雖復閒雅不脫酸習

詩話乾菴與沈啓南史明古矜契最深車馬登  
筮往還無倦其詩亦足相敵在都門聞東園築  
玉延亭留客園中艸木莫不有詩吏部後園亦  
為掃除欄藥檻花暇必酬和極友朋文字之樂  
余嘗見公家遺書偶有流傳者悉公手  
錄以私印記之前輩風流不可及也

讀廖司訓詩

先生撫州彥來為婺州師清晨坐高堂講席擁皋比弟  
子百數人出入矩與規先生以身教未嘗費言辭共云  
今人中得此胡翼之我友王允達托交兩無疑恨我不

識面示我所寄詩詩長三過讀讀之竟忘疲其辭如劍  
鋒凜然白差差上憂吏治陋下憂士習卑三復先生言  
苦心良可悲欲將今世人化為唐虞時竊觀先生心卓  
爾出等夷但恐言太高反為當路嗤方今法宮中聖人  
貴無為一相久自擇謂能繫安危守櫝既有人自毀玉  
與龜諒非有言責勿起出位思幸卷三寸舌橫經固其  
宜撫州古名郡山川有諸奇艸廬與道園近世尚可追  
著書寓微意足為千載垂再拜向先生吾言止於斯

送張都水

幽燕定都邑九鼎從而遷八政一曰食仰此東南偏歲  
漕四百萬舳艫相後先雲帆罷轉海江淮達且沿迤邐  
經齊魯有渠昔人穿噫此尋丈耳譬如溝澮然置肺以  
啓閉相時為節宣巖巖魯山下平地多流泉泉流入漕  
渠其始纔涓涓瀚淪惟自足安知可浮船疏導非人力  
濟世嗟何緣張君官水部治水思昔年往往相度之滌  
源同九川功成既歸朝大臣慕其賢封章始朝薦行李



仍夕旋維此百泉眼利博人爭傳入渠有餘漑可溉萬  
頃田只今東方民老幼咸顛連槁項與黃馘嗷嗷口流  
涎渚洩倘有策旱澇何須憐漕粟國用足種粟民生全  
他年司馬氏載入河渠篇

苦雨

入夏憂不雨雨甚又可憂幸此米價減宿麥且有收人  
情稍覺舒天意復見尤一雨過三日具勢殊未休九市  
成九河可車翻可舟側聞城西偏水患更不侔一家三

金方氏八ノ二  
卷二十八  
壓死傷者恐不瘳事急欲走避有足誰家投往夜東門  
火平明失其樓雨來火不作火滅雨乃流漢儒傳五行  
箕子敘初疇人過天亦過此理或可求賦詩遣孤悶廢  
卷發長謳

謝屠公送西域眼鏡

眼鏡從何來異哉不可詰圓與英錢同淨與雲母匹又  
若台星然兩比半天出持之近眼眶偏宜對書帙蠅頭  
瑣細字明瑩類椽筆余生抱書淫視短苦目疾及茲佐

吏曹文案夕未畢太宰定知我投贈不待乞一朝忽得  
此舊疾覺頓失謝却撥雲膏生白訝虛室扁鵲見五臟  
未必有奇術隨身或持此遂使目光溢世傳離婁明雙  
睛不能沒千年黃壤間化此直百鎰聞之西域產其名  
殊不一博物有張華吾當從彼質

鍾馗元夜出遊圖

終南進士狀酖醕虎韉烏弁鴨色袍青天白日不肯出  
上元之夜始出為遊遨鬼婦塗兩頰鬼子垂一髦徒御

雜沓聲噉噉以靈姑旗翼以大食刀離未罔兩不可  
一二數肩擔背負手且搯戰傷人血化燐火各出照地  
點點如焚膏陰風颯颯吹荒皋百怪屏氣不敢號汝輩  
遠遁莫我遭我欲飲汝血甘如飲醇醪我欲啗汝肉美  
如啗羊羔宥容汝輩在世長貪饕吁嗟乎魑也真為百  
鬼豪所以唐皇想其像詔令道子寫以五色毫憶當天  
寶年左右皆爾曹太真宮中逞狐媚祿山殿上作虎嘯  
當時便須縛以蒼水使者所捫之赤鯨獻於天閭尸諸

獸牢何為令溫泉生汙泥驪山長蓬蒿吾嘗疑其事展  
圖不覺再把短髮臨風搔

送胡彥超

年過四十不作官還將短髮籠儒冠平生一經已爛熟  
胡為挾入橋門觀前年鄉書名始刊曲江又避春風寒  
重來橋門住三載打頭矮屋聊盤桓朝齏暮鹽不滿盤  
何須故人勸加餐日高對案笑捫腹自有五年之琅玕  
側身西北望長安眼中一朵紅雲團天門欲往澀如棘

若比蜀道尤云難嗟哉出處誰得似頗似吳下吳生寬  
吳生作詩忽盈紙送君還到春闈裏春闈多士多如蟻  
勿將老少分憂喜君不見韓昌黎張童子同是陸公門  
下士昌黎文章如皦日童子聲名逐流水人生傳世有  
如此區區科第何難耳

題鄭郎中所藏張師夔畫

師夔畫好不可誣筆法頗似崑山朱未論人品高與下  
胸次自是吞江湖平林絕澗雲模糊深處自有哀猿呼

青苔細路絕人跡遇著即是漁樵徒忽然空翠落衣袖  
崇山峻嶺相縈紆丹梯百尺通玄都仙家茫茫還有無  
卧游三日猶不足王維輞川無此圖題詩却問鄭大夫  
此圖應著千金沽

賦黃樓送李貞伯

維河有源星宿同導河積石思神功濁流汗漫失故道  
積石却與澶淵通平郊脫轡萬馬逸一夜徑度徐州洪  
徐州太守蘇長公夜呼禁卒登城墉一身未足捍大患

豈無木柵兼竹籠戲馬臺旁二十里有隄橫亘長如虹  
高城不浸三版耳挽回魚鱉仍耆童防河錄成有天工  
黃樓高起城之東五行有土可制水底用四壁塗青紅  
太守登樓賓客從舉杯酌水臨長風河伯稽首受約束  
不敢更與城爭雄水流滔滔向東去紆徐演漾殊從容  
負薪投壁竟何用漢家浪作宣房宮自公去後五百載  
水流有盡恩無窮我生慕公公不逢安得置我茲樓中  
穎濱淮海獨何幸留得兩賦摩蒼穹鳳池舍人今李邕



南行別我何忽忽登高眺遠必能賦封題須附冥飛鴻  
送王合州

南出都門去逢人問合州一官為別駕萬里付扁舟  
巫峽流泉曉峨眉半月秋緣知蜀道易隨處有詩留

登故友史西邨小雅堂

路繞黃家溪水長春風灑淚復登堂艸荒求仲常來徑  
塵滿元龍舊卧牀分手死生嗟契闊傷心聚散覺淒涼  
高丘數尺棲神地碧樹爭凋不待霜

分韻送貞伯

忽對春風南陌還  
思夜雨西窗高  
丘恨不千尺望見離  
人渡江

題畫

水長鵝臄蕩口花飛鶯脰湖邊吳歌唱徹歸去日暮青  
山滿船

除夜

夜深燈火四無鄰  
強醉金陵麴米春  
却憶去年何處宿

三义河口更愁人

楊一清

二十一首

一清字應寧雲南安寧州人成化壬辰進士授  
中書舍人陞山西提學僉事遷陝西副使召為  
太常卿拜左副都御史巡撫陝西厯戶部尚書  
入直內閣進少師兼太子太師吏部尚書華蓋

殿大學士卒贈太保謚文襄有石淙臺

李獻吉云先生

詩矜持嚴整俊拔典則七言律為最工雖  
唐宋調雜瑜瑕靡掩然所謂千慮一失也

詩話遂菴古詩原本韓蘇近體一以陳簡齋陸放翁為師獻吉送昌穀詩云吾師崛起揚與李力挽元化迴十鈞初意楊非李敵不過為師同年及觀石淙集實有高出李者乃知文士以千秋自命類不輕許人也

舟中感興

宋朝西事興廷議仗數公三策戰守和持論多不同韓公初主戰提旅當賊鋒至今好水川流血餘腥風范公圖經略志守不志攻雕陰扼其吭靈武城其雄大順屹有築清澗引而通雖無賊俘獻已遏賊馬衝終教賊膝

屈西顧聊從容臣本鉛槧儒豈不念除兇功成枯萬骨  
生意隨秋蓬而况兵家事勝敗誰能窮設險有明訓著  
之易象中沙場四百里深塹連高墉一勞還永佚誓以  
輸愚忠云胡嘒嘒者計不究初終作詩俟君子庶幾希  
後功

聞人道漢中事

相逢漢中人為問漢中事政殘令復弛此階誰作厲有  
兵不識鬪有地無遺利紛紛散攘徒來自川西地初焉

甚微眇可以折筮治玩寇者為誰彌文巧蒙蔽星星不  
時撲漸成燎原勢重煩宵旰憂撫捕勤大吏彼氓亦何  
知從亂豈其意分明盜兵革潢池作兒戲胡忘渤海言  
而咏朝歌智居然恣屠戮為此首功計番兵及礦徒剽  
掠失防制如以賊禦賊進退誰適避寧偷從賊生懼作  
迎降斃遂令漢沔間羣盜益昌熾村落莽成墟野烟浩  
無際師久力漸屈饋餉遠難繼壯士飢而逃道途目相  
視闕津不敢詰將領莫能致仲秋交兵辰諸軍自同異

貌貅頗創傷狐鼠未懲艾如聞制府來轅門稍生氣夾  
攻本良策萬全亦非易成功在此舉莫使再顛躓人言  
川賊興正坐科徵敝民窮盜斯起思之無乃是反本宜  
急圖窮誅竟何濟邇來天監昭大奸伏礎鎖湯網解而  
疎武戈藏不試寄語賣劍人太平今立至

山中吟

兩旬天氣看復陰黑雲故故團春岑耳邊時聽潭龍吟  
深山大谷不可宿前途風雨愁人心

未至府谷得山西胡憲副源梁詩先是予與源梁  
約保德府谷為渡河之會源梁先至以詩來速和  
韻答之

榆林東來神木道我心擾擾風中燾病軀不任馳驟勞  
況是長途阻霖淖眼前車馬恨躑躅夢裏衣裳或顛倒  
當秋一雨近歲無破屋家家蛙產竈至今溽潤滿庭戶  
蟻蛭縱橫聚難掃人可勝天理則然古有堯湯非羿禹  
吾皇憂民過往聖德旨蠲租憫無告邇來天澤閔不流



赤地茫茫方苦燥頓使呻吟化歌舞果然大命由人造  
知君命駕千里來神交豈是私相好一官同擁繡豸服  
矢心不媿皇天燾翻愁左顧勤撫訶賴有先憂繫懷抱  
晉陽一別六七載如瞽偃偃藉誰導龍門尚隔衣帶川  
意逐書郵已先到陽春下里本非類木李瓊琚浪酬報  
吁嗟伐木久不聞友道蒼茫竟彫耗人間此會苦難得  
肯似山陰空返棹與君興在希聲前不待冰絃已成操  
元龍大床吾欲卧可聽登堂窺寢奧

送安成張都憲督運還鎮

文皇北狩開洪基古之燕薊今邦畿官河舳艫挽飛粟  
歲四百萬供京師直從三湖到瀛海四十餘閘中逶迤  
雖云恭襄擅勞績廟算天假非人為漕規百年漸成敝  
民財已盡兵兼疲豪門貸券不知數公廩未入私逋追  
姦人復此恣漁獵罔念膏血成塗泥君王聞之重悽惻  
曰此瘡痍當底綏詔求經濟起頽廢公名首應朝堂推  
都臺舊豸許重著先聲忽滿清淮湄褰帷問俗布新政

風霜雨露無偏私人言更化先將領疏屏庸瑣將無遺  
明揚才俊給任使數月威令如飈馳高山虎豹莫敢狎  
精采一變非前時疲氓敝卒總生氣昔者戚戚今嬉嬉  
朝廷綱紀藉臺憲頗恨吾人翻壞之姑息之風滿天下  
漢家三尺空然持剛者矯枉不達變志固可取終何裨  
不然淫刑肆屠刈忍寡人婦孤人兒公柔不如剛不吐  
寬嚴兩酌還平施淵魚苛察豈公事權度在我誰能欺  
漕司政務亦填委老匠坐授羣工治如身使臂臂使指

大綱一舉萬目隨安得皆公撫諸鎮頓使赤子回春熙  
嗟予闕中舊分憲蒞公節下叨公知迂疎未敢辱同調  
頗覺氣類元相宜公今入覲天顏喜縉紳動色瞻風儀  
太常閒曹無報稱却望賢勞增忸怩秋風冠蓋送歸鎮  
把酒欲賦難為辭似聞臺省虛公位尚為淮人歌去思

畫鴈

江岸蘆花秋簌簌江頭旅鴈羣相逐啄者自啄宿者宿  
昨夜南樓聞北風天長水闊雲濛濛何當舟一葉權入

蘆花叢

甘涼道中書事感懷 二首

望望日以遠行行春又闌  
蒼茫青海月咫尺玉門關  
北關星辰上南州夢寐間  
青山隨處有一見一開顏  
弧矢威天下雷霆震域中  
大兵方出塞小醜自相攻  
繼絕君王義宣威將帥功  
從今宵旰慮不復在西戎

聽雪

庭樹蕭蕭夢屢驚幾回風景逼人清  
坐吟食葉春蠶句

起聽空山裂帛聲寒落瓦溝停更響爽疑天籟靜還生  
憑誰為續幽蘭調萬古悠悠此夜情

孤山堡

簇簇青山隱戍樓暫時登眺使人愁西風畫角孤城曉  
落日晴沙萬里秋甲士解鞍休戰馬農兒持券買耕牛  
回思未築邊牆日曾得清平似此不

出連雲棧

雞頭關下石杈牙傍險憑高此駐車一水縈紆通漢河

萬峰迴合控褒斜雲中板閣燒難絕谷口簣簞翠欲遮  
蜀道秦關俱莫論於今四海正為家

山丹題壁

關山偏仄人蹤少風雨蒼茫野色昏萬里一身方獨往  
百年多事共誰論東風四月初生艸落日孤城蚤閉門  
記取漢兵追寇地沙場猶有未招魂

還至莊浪

平沙落日路漫漫千里風光一色看剛道雨來翻見雪

偶然熱後忽生寒城非據險兵猶少地屢經荒食更難  
稍喜沿邊諸將吏肯甘清苦慰彫殘

聞河套有警

百二秦關故可憑延寧千里險堪乘濁河下遶還成套  
曠騎東來慣蹋冰塞上煙塵嗟未息胷中兵甲媿無能  
粟島山積君休羨民力年來已不勝

出郊

向來塵慮已真拋一卧經年始出郊天下華陽稱八洞



人間福地是三茅病求仙术聊充餌老愛雲松願結巢  
夢覺迷途自茲始北山猿鶴謾相嘲

將至寧夏

奉詔西征駐節時元戎奏凱已先期苗民自逆三旬命  
獵狁何勞六月師燈火家家開夜戶弓刀隊隊卷風旗  
益兵加賦休重道財力於今兩不支

邊汝成侍郎話舊

病裏詩成手自書重逢又是十年餘已看精力消將盡

何止聰明較不如西去幾回勞  
遠夢南來聊得慰閒居  
故人不道吾衰甚猶有微言為起予

竹西書屋

萬竹參差路不分  
艸堂風景隔塵氛  
他年有約東鄰卜  
半為先生半此君

和西涯漫興

園亭風日入清秋  
綠樹陰陰護四周  
頗恨青山看不見  
似應別起看山樓

遊茅山

丹梯百丈許攀緣萬古華陽此洞天不獨山人能愛客  
野花啼鳥亦欣然

題畫送謝岐歸閩

有足不蹋風塵車有手不艸封禪書茫茫天地誰知己  
還指梅花是故廬

文林 三首

林字宗儒長洲人成化壬辰進士除永嘉知縣

改博平陞南京太僕寺丞遷知温州府有文溫

州集

永嘉縣齋寫懷

墨綬垂青絲銅符寵郎秩駕言謝朝行出領滄海邑脈  
脈辭親知依依去鄉國淅行僅千里已在東南僻地遠  
煩刑誅年貧正艱食自顧書生愚疇堪付休戚流移已  
懷慚征斂况余職平生跌宕懷雅志山水適及此東嘉  
遊清真信靈域豈無康樂情坐有民社責斂板事承迎

鈎稽因文籍拂意不能歸自媿陶彭澤

靜海驛

深夜驛途靜長河瀚海通舟明沉水月燈暗落潮風暝  
色浮煙外春光欲雨中年年苦行役蹤跡仕飄蓬

舟中有懷林待用

渺渺長波映遠空依依新柳颺春風相思人在青山外  
盡日舟行細雨中汲黯身為漢廷重杜陵詩到錦城工  
天王明聖江湖遠贏得驅馳兩鬢蓬

周軫一首

軫字公載莆田人成化壬辰進士歷官江西按察使有章林藏橐

和竹溪見贈歸來亭

小亭岑寂四窗開坐看春風長綠苔為愛多情雙燕子  
暫時飛去又飛來

黃榮一首

榮字儼仁莆田人成化壬辰進士官按察僉事

有柳南集

牧牛圖

江草青青江水流  
卧吹孤笛弄清秋  
放牛莫放南山下  
昨日南山虎食牛

楊榮

榮字儼仁莆田人成化壬辰進士官按察僉事

主事

黃太冲云都水工於詩會試舟中取唐音和之月餘成秩一時風尚和唐音而都水

能得其風致徐子元詩  
談與慈溪張式之同品

江西旅懷

客夢家千里鄉心柳萬條  
片雲遮海嶠一雨送江潮  
戀闌綈袍在懷人尺素遙  
春光看又晚何處灞陵橋

子規

江天夏夜露氣清  
山鳥忽作斷腸聲  
莫道啼多不解意  
催人歸去最分明

明詩綜卷二十八